



橘山四六卷第十四

古

潛

李

廷忠

居厚

重明節賀表

得道爲皇久燕大庭之養先天誕聖丕昭華渚
之祥洽慶禮於三宮藹頌聲於萬宇恭惟

太上皇帝陛下功成不宰德運乃神繼照于時
合重離明兩之象高尚其志應大有上九之爻
與造物以同游自生民而獨盛正任莖浮沆瀣
之氣乃慈闈標震夙之期臣將指行邊傾心報
上奉玉卮呼萬歲阻陪漢殿之班獻寶鑑紀千

秋願効唐臣之祝

重明節賀表

天子之父曰皇備舉日朝之禮老人之星主壽
適當秋見之期對金鑑以交輝望瑤階而歸美
恭惟

太上皇帝陛下持循一道度越百王錫元圭而
告成功居然退託索元珠而悟周象至矣冲虛
祥開誕月之符丕衍過期之歷慶賚渙敷於前
殿懽呼震動於中嵩臣假守窮邊幸逢盛際三
萬里恍遙於弱水莫與稱觴八千歲仰祝於大

椿第勤舞手

瑞慶節賀表

十月就盈祥開若水四方未賀驩動中嵩昭聖
人間出之符衍治世無疆之歷恭惟

皇帝陛下握樞運化紹統垂休坐明堂而朝諸
侯式顯肅雝之相體北宮之奉太后聿崇欽愛
之風具此丕猶萃為繁祉當流虹之紀節咸就
日以傾誠臣服後行臺但陪班綴錫皇極之九
五福如近對於天光祝聖壽之億萬春切喜聆
於輿誦

瑞慶節賀表

天子接千歲之統茂對亨加諸侯賀十月之朝
訢逢震夙仰瑞符而有耀申善項以無疆恭惟
皇帝陛下叙禹九功傳堯一道天璣麗正赫重
離繼照之光神鼎持盈備既醉太平之福敷兩
階之文而裔夷服飭九造之祝而人神和萃此
丕休見乎初度樞電旋於北斗孤星燦於南郊
臣叨領邊麾遙瞻觀闕公卿迭進已莫陪奉觴
上壽之班田里交歡其敢望增秩賜金之寵

瑞慶節賀表

周歷方新應七百年之興運堯門有慶當十四
月之誕辰喜溢乾坤項騰川阜恭惟
皇帝陛下緝熙帝載恢大皇綱躬儉約以移風
惟仁柔而理物文軫通乎薄海坐收極治之功
神笑授于上天丕擁無疆之福流虹紀節舞鳳
來儀臣假守荒邊欣逢盛際北辰之居星拱奠
預對揚南山之壽日并敢忘美報

瑞慶節賀表

天作之君紀載生於甲觀人助者信効三祝於
華封福履日并歡呼雷動恭惟

皇帝陛下整齊王度恢石神基儉德冠乎百王
至矣在躬之寶利澤施于四海熙然同宇之春
羽階敷未遠之文鱗隄奏屢豐之瑞明良胥契
清淨興歌當若水之開祥指如同而歸美臣猥
叨共理欣際盛明望官闕於蓬萊之山阻陪拜
舞卜世年於郊廓之野徒切傾祈

瑞慶節賀表

系唐統接漢緒聿觀真主之興界姒書授羲圖
茂對上天之眷歷千秋而紀節薄四海以均懽
恭惟

皇帝陛下祖烈丕承皇猷濬發乾行而道不息
泰來而志交通握金鏡以臨人旁燭八紘之遠
運玉衡而審己坐調五緯之乎農扈登秋候亭
沉燧薰作至和之福萃于載夙之辰臣欣睹榮
光謬將隆指雖君門遠乎千里信不遠顏而聖
壽過於萬春惟勤善項

冬至節賀表

歲得天屬三微之肇叙雷復在地知萬彙之潛
萌亨會有聞頌聲交鬯恭惟
皇帝陛下紀綱四國規矩二儀赤祚重光千歲

接帝光之統元圭告瑞八年成大禹之功擊道
揆之精剛調化元而宣穆方義穀起牽牛之度
乃解籥奏鳴鳳之音福與陽升壽隨春介臣叨
縻郡紱阻奉庭班日月合五星連欣迓初長之
景冬夏至八風序願書大有之年

冬至節賀表

灰律動于緹室初驗陽生雲琴奏於園丘茂迎
日至大矣一人之慶熙然萬彙之亨恭惟

皇帝陛下黼黻洪猷樞機元化敬五事協五紀
開乾坤交泰之符合八能陳八音正禮樂復興
之日排窮陰而出地導和氣以浮春沸在朝在
野之歡聲介如阜川如之遐福臣逖居邊服欣
際昌辰望拱北之星阻綴珠璣之末迓極南之
景彌占鼎筮之長

正旦節賀表

春王正月麟經書五始之元天子萬年鳳曆啓
三朝之慶勾萌畢達戩穀具綏恭惟

皇帝陛下湯銘又新禹服惟舊齊六符於泰階
之上運五紀於皇極之中天地塞而後通允合
大來之吉日月窮而復始方觀繼照之明加與

卷十四
五
函生同躋亨運臣駢馳在遠舞蹈宋塵想蒼龍
駕之迎春咸知農候舉白獸樽而上壽夏禹何
班國郵後

正旦節賀表

太簇告辰小正布令道音徇路萬民新治象之
觀計奏登軒四海盛貢珍之會恭惟

皇帝陛下仁天廣覆壽域旁開時明於革而得
順應之宜道長於泰而極財成之妙虽舜庭過
密未容百辟之獻觴而堯野謳歌已肇三農之
舉耜芳辰茂對景福來符臣際運重熙蒙恩共

理望光華之夜燎阻綴賓儀奉寬大之春書務

宣德意

正旦節賀表

行夏之時會三朝而受籍望堯之日歌萬壽以
稱觴歲祚肇新物情胥悅恭惟

皇帝陛下鴻明麗正駿命申休黼黻珣戈增煥
右文之治調和玉燭莫神贊化之功再世奉長
樂之顏庶民同既醉之福運承累洽月屆始和
正百度於履端萃萬珍而入貢寬澤橫流於薄
海祥雲廣覆於層霄臣身係西陸神馳左城想

九賓儀之戒旦阻綴班聯奉五條詔以頒春第
增舞抃

正旦節賀表

帝出震以御辰莫妙圓規之運王次春而布政
有嚴左个之居會圖藉於三朝拜衣冠於萬國
恭惟

皇帝陛下躬脩禹度首正光網乾坤泰來游岩
廊而自治日月清照奄函夏以無塵方講禮蒐
樂以文太平務先德緩刑以贊元化茂對始和
之吉丕膺滋至之休臣乘塞云初迎年載喜詔
書寬大下車即謹於布宣觀闕峩峩矯首莫陪
於呼舞

改元賀表

加泰

對熙辰而頒朔屬當王化之更輯美號以冠元
庸迓天休之至九重明令八表均懽恭惟
皇帝陛下躬握樞機神存經緯亨為加會參四
德於純乾吉與泰來叶三陽於端月順而建政
用以名年邦雖舊命惟新丕昭上意物所始歸
謂大允合群心臣欽睹弥文喜逢昌運方効駉
馳之力阻陪拜舞之班治跨漢京小鳳龍之紀

瑞恩霑淮服極草木以同春

改元賀表

加恭

皇運重開方叶三陽之吉年名肇建式均四表
之權自帝降康與民更始恭惟

皇帝陛下智神旁燭道宰中持積六稔之憂勤
順群心而變易天地交而曰泰喜臨物棟之辰
春秋一以為元遂正歲端之號表休符之有赫
綿慶緒於無疆臣恭對昌辰喜聆溫詔二千石
上壽阻陪正會之儀億萬載太平願獻元和之
頌

明堂禮成賀表

輯鉉議於曲臺藏精禋於太室三靈昭格萬祉
未崇切以秋而大饗者典有常闕雖多故而禮
為急屬此卜郊之歲考諸越紉之文翼：堂造
式廣寧之孝輝：壇燎采昭款帝之誠恭惟

皇帝陛下位正体元道深酌祖文化緝熙於百
度寬恩滲漑於群生邊塵不驚民食自裕以聖
繼聖功方美於告成因天事天義莫嚴於陟配
洎上辛而肇祀端左介以迎禧景鑠神光煥耀
叢霄之下驩聲叶氣翱翔薄海之濱臣護漕邊
城逖瞻鉅典助祭而刑百辟莫於駿奔欽福以

錫庶民弟勤虎拜

太后加尊號賀 皇帝表

雲閣重侍夙承詒燕之謀天號渙陽虔奉歸尊
之冊驩均有截福介無疆臣聞漢立四宮莫隆
乎長信周稱三母實始於太姜蓋孝之大者顯
其親必等而上之至于祖先朝資輔贊之力再
世蒙擁佑之功信非常名可盡至美恭惟

皇帝陛下大猷稽衆高行冠倫五日東朝本列
聖相傳之懿一星南極正老人以見之時壽齡
將七袞之崇寶牒不一書而足對揚景耀丕闡

上儀形愛敬於四方奉怡愉於億載臣縻身淮
許矯首日邊赫：魏：而超古今亶曾華於帝
典蟄：繩：而宜孫子願播美於王風

賀 太后牋

神怡廣內夙推坤則之成位極掌尊宜配乾稱
之大勅崇丕號哀對脩齡恭惟

太皇太后齊耀星軒發祥沙麓言動中乎繩矩
功德被于声歌輔烈祖以中興柔化斯正抱神
孫而內禮大計以安萬游心少廣之庭信比迹
大任之聖徽名疊上鉅典載新臣叨領邊麾阻

陪朝綴唐宮受冊逖瞻萬舞之儀漢殿歆觴切
効三呼之祝

太后加尊號賀 皇帝表

光動鉤鈐侈重親之孝養名垂琬琰藏曠代之
慶儀宗社有榮人祇胥抃臣聞君子重抱孫之
義生民推尊祖之功故唐冊显于懿安而漢號
隆乎長信虽非三朝全盛之典要皆一時歸美
之名視昔加崇在今創見恭惟

皇帝陛下緝熙王化表显聖倫承上天與子之
心既親傳於歷數體先皇事母之禮益嚴奉於
晨昏壽袞有開徽音未鬯載肅鳴奎之駕肆登
鏤玉之文虽太極之高可誦而不可名而簿海
以外知孝而又知敬臣濫將華指阻綴清班七
六經之傳既極坤稱之美九五福之錫弟勤封
祝之誠

賀 太后牋

燕謀啓後尊歸長樂之母儀鴻號殊常丕显思
齊之聖德事光史謀禮洽宸闈恭惟
太皇太后馮水源深塗山基正羨本支於百世
首推命之勲侈福祿於萬年垂及縱心之境

養以六下莫伸於歸報至哉坤元可得而形容
冊寶告成旂常增煥孝治通乎三極歡聲匝於
九圍臣欽睹弥文屬行邊鄙對金波而稱壽厥
路無絲奉玉檢以揚休乃心則喜

賀 皇帝加 太皇太后尊號表

慶衍瑤圖備文孫之至養光昭玉冊崇太母之
丕稱禮洽宸闈驩騰海縣中賀臣聞義先乎褐
化始於家後世之法姚虞必觀媯汭生民之尊
后稷爰美姜嫄視前懿以增輝屬熙辰之盛舉
恭惟

皇帝陛下繩々善繼業々致思列聖貽謀莫重
天倫之愛三宮順事共推坤極之隆忌有加而
報亦虔位無上者名斯显侈殊常之令典奄有
熈之柔風臣叨與乘輶訢逢出綽朝於五日阻
陪長樂之仙班奉以萬年願頌元和之聖德

賀 太皇太后牋

層闈闈慶丕膺難老之符前殿貽謀崇建極尊
之號一新孝理四達歡聲中賀臣恭惟
壽成惠慈太皇太后殿下播美河洲發祥涓涖
聽宜六之治徽風備暢於六宮禋與子之謀寶

命有於再世儷重華而迪德生少廣以凝神
龍衮稱觴並舉日三之禮金車受冊益迎時萬
之休燕及雲仍冠于今昔臣猥叨華遣欣際盛
明望東朝太后之班鳧趨莫旅上南極老人之
祝鰲抃惟勤

賀 皇后牋

德備思齊美妃風之克嗣號隆長信显母道之
益尊歡達外區孝歸中壺中賀恭惟

皇后殿下倪天作合邇日為明詵：揖：而宜
尔孫上体二南之化怡：愉：而奉太后助登
萬壽之儀玉冊揚徽椒塗增擢臣叨持華節欣
舉綉儀周道載駸莫綴九賓之列光門在望弟
傾三祝之誠

冊 皇后賀 皇帝表

移風以厚人倫造端有地厚星之配皇極作合
自天侈鴻號以揚徽煥翟容而增飾中賀臣聞
夏之興也助德本於塗山虞其欽哉觀刑始于
媯汭故凡聽睿有臨之主必資警戒相成之賢
禮舉熙朝事光前史恭惟
皇帝下紀綱四國規矩百王致大養於重闈

載篤一孫之慶奉明禋於太室丕照烈祖之光
位未正於椒塗化莫延於葛谷恭承慈訓喜得
淑才擢從坐論之聯嗣舉儷升之典嬪則著於
宮壺王化達於區寰臣攝事西臺阻班北闕在
天下而為母允合坤稱願聖人之多男弟壺封
祝

賀太皇太后牋

副禘而立東房聿崇正號盛章而朝長樂有美
柔儀慶洽兩宮驩翔八表恭惟

太皇太后天慈敷化坤靜含章義重承祧抱神

孫而內禮恩深佑命選淑媛於後庭欲昭儷日
之華遂正長秋之位翟車聯擢蠶服同親既足
廣四方之風益將侈萬年之福臣屬拘官守阻
綴庭班

賀皇后牋

藹南國之風有光彤史嚴東朝之命登配紫宸
恭惟

皇后殿下淑惟天成芳猷日進睢河声播思賢
才無傷善之心葛谷化延在女事有節用之道
擢自一星之次儷于兩曜之明承順慈顏奕和

陰教不二其操宜君子之好速則百斯男蓋國人之共祝臣屬拘官守阻造闕庭

賀 皇帝御正殿表

畢親喪於素帷勉循御樂之常正皇位於紫宸
丕展會朝之慶千官醵抃土九葵傾恭惟
皇帝陛下舉充太綱纘禹舊服塞天地橫四海
已昭孝則之成和邦國諧萬民難遏淳音之奏
遵奉常之吉制詔太僕以前陳黼坐當陽龍章
絢采巍々乎宅中之勢穆々然臨下之光凡在
觀瞻孰不鼓舞臣星輶濫駕雲闕阻趨更始而

順民心復賄禮文之煥麗正而化天下益知儀
表之尊

賀 皇帝御正殿表

密音載啓御素軫以迎祥大寶有臨坐端闈而
聽治臣工胥抃夷夏聳瞻恭惟

皇帝陛下化闡邦經行隆世表三年不樂方當
聖治之更新四海為家宜士皇居之壯麗庸正
面南之位聿昭建極之光肅天仗以無諱儼帝
容而有穆衆星環拱萬工未庭道燦然而復興
之煥乎其可述臣身縻符竹夢逸觚稜斧扆而

朝諸侯阻陪賓綴簫韶之舞百獸徒激懼悰

橘山四六卷第十四

橘山四六卷第十五

古潛李廷忠居厚

謝閣學葉尚書舉自代

西清學士之建崇名世而分虎即墨大夫之無
善譽許以績貂豈為特異之知卓有至公之舉
竊聞存人所以自立代已亦宜相當此皆先儒
之談足為今日之法侍從之間方將拔杞梓而
收樗箇明聖之前豈容進銑醜而夸輿璿故限
之以三日之期惟冀於得一士而告苟非素窺
其肝膽必不妄借以蓋才自虞廷衆賢興遜睦

之風故讓于契讓于夔讓于虎追東都大臣盡
公清之節謂不如廣不如暢不如膺豈伊簿書
冗瑣之流亦在簪橐推陽之數如某者嗇於賦
授強厥操修披卷莫窺姬孔之牖窓弄翰豈識
曹劉之畦逕自頽鐵心石腸難取媚於世渠肯
梔兒蠟言妄未售於朝從諸生遊寂寞之濱教
僅行於泮水率吾農耕歛岑之上政惟慕於魯
山虽嘗被兩地之薦論固已絕九霄之榮望竭
耒于此飢使之然三公縱有知音人一生終費
造化力儻非具眼疇克裏言茲蓋伏遇某官冠
冕儒流權衡國論佐天子相天下已素存遠大
之規摹開賢館延賢人欲共立光明之事業扶
持弱植洗濯凶埋媯閣穿班本以寵建旗之行
齊鄉下品乃令充越俎之代初不緣介紹之助
又非徇故舊之私教語品題衆聽驚駭以粹淵
之譽散藻陋學以雅贍之名宮商猥文謂試邑
而著聲稱茂聞撫字之術謂代臣而允公議安
得論思之才念其久孤於外官姑以借重於當
路與之過分受者胡顏某敢不勉策愚駑追攀
良駿一盼增價忘其身之在塵泥九殞酬恩誓

此心之如河水

謝陳中書舉陞陟

袖製錦之刀深負多傷之懼簪判花之筆遽騰
 過實之褒惟要人言語之不輕信小吏功名之
 有託如某者嗇於賦授強厥操修同前三公縱
 有知音人孤生終費造化力歆圖宛轉於半刺
 猶欠閑陞之一章具眼相逢引手獨援茲蓋仗
 遇某官諸儒冠冕四海舟航以端潔之操儀禁
 涂以簡古之文發帝令佐天子相天下已先存
 遠大之規模開賢館延賢人欲共建光明之事
 業扶持弱植洗濯幽埋虎榜首登每加念同袍
 之士鴛班未綴未容着束帶之人方此陸沉慨
 然汲引洪以青雲之價蔚為墨綬之光某敢不
 务澡其身益耘所學銜環結草未足酬咳唾之
 恩附驥攀鴻尚許借飛馳之勢

上廟堂

我重親人訪疾苦於延英之殿禮先下士進狂
 愚於光範之門俾得自輸庸觀所蘊從古有子
 男之秩在今為令長之官元至衆實繫命於
 斯空不學幾墻面而已所以廟論尤嚴推擇

選格不許僥踰必舉者五人而後與朝籍之通
凡上而六院乃先處縣章之最屬時多故計劫
惟艱財賦促辦則生人之膏血已窮期會稍稽
則上府之譴訶立至責以拊摩之實惠信乎拘
閱以難行譬猶掣肘而求善書絆足而望千里
且喧之屬邑可數唯旌焉累政不綱百蠹所侵
五枝莫措官無砧基而文帳變弄於黠胥之手
產歸富室而稅物坐留於窶人之家健訟輩肆
持控之戈矛攬納戶為姦欺之囊橐又况窮山
不通舟楫乃踰二百里輸木以實州倉狹谷無
多繭絲率計五千疋市絹供而戶部推酷廢地
理額依元田畝落江征租如故民困已甚吏良
其誰非得疏通敏劭之才安有整辦修明之治
如某者大拙難化小康自將初收科級而蔭尚
清洎脫選坑而頭已白石田苑屋念鄭廣文作
歸來賦而未成山縣竹林謂韓昌黎讀出宰書
之可慕適繼踵頽車之後乃墮身沸鼎之中剔
扶弊根植扶生意猛以濟寬寬以濟猛初無偏
勝之心官不擾民民不擾官粗得相安之道珥
筆之風少革係纏之地常空書旱書水而書螟

何鄰邦之多難登麥登蚕而登穀幸吾境之獨
豐因民之有餘力而建河橋慮士之無常心而
創學廩人免病涉俗期化成用茲微勞遂以善
罷苟妄自誇詡豈能掩當路之耳目特拙於干
請不復掛諸公之齒牙豈期賢侯獨異流俗因
輿言而採聽以謬狀而薦聞所訢更化之期方
嚴責實之政可進則進毋廉於自進當言即言
胡訥而不言其在元工必無弃物恭惟某官望
隆時棟識炳神著自天生賢才猷亞於申甫仍
世作相勲業過於常平扶傾靖難於声色不動
之間聚精會神於論說無疑之際姦黨去而國
有元氣公道立而人無倖心謂權網實在於謹
持則名器豈容於輕假內外治恢張之有叙小
大臣磨淬以承休茲舉景從氣求聲應分鴻振
鷺悉歸梁國之網羅枯木朽株獨乏鄒生之根
抵敢扶孤意輒附榮光冒千巖之險而過一關
誠為不易涉九淵之深而求至寶亟往何疑

再上史丞相

再提筆福蒼生俱俟埏陶之久三吐餐接白屋
靡嫌贄見之繁俾賢愚無同滯之憂在朝野有

咸和之慶凡一相處乎內歆萬物得其平哉者
培之傾者覆之初何意用意往者屈也來者伸
也蓋亦因時鳶飛魚躍於二氣交感之間荔挺
芸芳於一陽初升之後有機緘不容自己是維
網所主其誰屬名教之儒人作宗師於善類恭
惟某官才軼諸老學袂先賢以社稷之安危寘
于懷以天地之生殺權其用流共殛鯨悉出深
謀召鄒延枚共更善化坐論道以得經邦之要
世載德而成柱國之強滅甲兵安井田欲迓升
平之運幹璿衡揭日月方資燮正之工極宸之
眷知即倚廬而起復羽儀黃閣移孝為忠掌握
紫樞濟文以武東禁籍師承之益北鄰脩賓服
之恭有是伐閱功勞豈漢之富民侯而可疑全
其典刑號令雖唐之大國臣而莫加聽如綽之
王言踐維垣之父業某道傍苔味石上寒根竊
有司之第重三十年閱在官之簿才八九考鄧
仲華可郡文學乃分之宜孟公綽為縣大夫曷
云其稱雖弦歌兩地喧寂之有間而金石一心
夷險之不渝力持清勤振起頽廢刑常虛於貫
索政亦辦於繭絲蜚不秋灾龐無夜吠三年登

稔四境晏熙與民相安初非以賈得以道得以
 治得在已無愧焉知不恐欺不敢欺既
 誤竹符使之為聞又叨荷橐英之舉代幸逃吏
 議復作京遊一書登徹於廟堂半歲滯留於邸
 舍裴回顧影顛顛失容索米長安中妄自希於
 暮召買卜成都市杳難問於天津會上袞之顛
 朝睹洪鈞之重轉昭蘇久困喜躍自鳴由鳧鷖
 之行望鷓鴣之班固知遼絕脫蛇鼠之賤為龍
 虎之用實在生成迫切投辭虔恭俟命

除鄂倅謝廟堂

凡骨難僊有孤造化壯心易老合早歸耕荷上
 宰之曲成叨大邦之半刺未容影組問煙霄之
 路猶得坐輿觀江漢之流咸謂拙謀自知過分
 伏念某五窮者技百醜其形小鳶之搶榆枋鳥
 敢笑鵬鷖之運孤鴻之喋糝稗僅堪伍雞鷺之
 群胡弗揆量妄希簡拔然其進也絮夫已以進
 而其求也異乎人之求嘗慕先賢重於去父母
 之邦豈隨未俗紛然趨名利之府清明所照白
 墨自分矧當圖乂以更張務在責成於撫字居
 官不治合如楚子文三已之入境無灾此固魯

中牟一異也。有斯績用，不我取。尤故賤名達朝。廷或輓之，或推之，非公議。在廟堂孰主，是孰維。是上書，蓋喜於自銜獻治，乃疑其不祥。方歸興在萬山之間，忽除目自九天而下，俾乘別駕，往佐名藩。鸚鵡洲前，平分清景。貔貅帳下，密贊邊籌。俱非小器之能勝，抑見洪鈞之善與。茲蓋伏遇某官量涵無際，識炳有融。以君子育才之道，相其君以國家尊賢之經。治其國，揮沐吐餐而忘劔。離疏釋躄，以皆徠。雖愛名器，不輕以假人。而執權衡，莫先於平物。有能者進而不能者退。允合僉言，無廉之實而竊廉之名。詎容濫吹，蓋將尊王澤以被於下。又須更民治以究所長。挈此庸虛任之，開決某敢不悉心砥厲。委命埏陶，苟捨此官，安得有南樓之勝，歆觀竒士。固難希東閣之留。

通范運使

行臺之聯郡組，仰欽節制之尊。別駕之旅賓，蓮實贊籌謀之末。昔雖忝同進士之列，今敢居半刺史之名。獨以三階之久，遽忽此二天之下。照喜極舞手詞，能矢心恭惟。某官學致遠而鉤深。

智融內而光外藏器甚偉得與則亨世上文章
孰踰岷山巴江之秀氣物表風韻真是方壺負
嶠之勝流持月賜之筆以儀天朝衣畫行之錦
以榮鄉國方卷甲定盟之後念係兵轉食之艱
洞達源流恢張網紀木牛運流馬運妙傳蜀相
之遺銅虎符竹使符仍借漢郎之重故民不益
賦而用自足雖國有流災而備在先萬竈晉春
百城不夜隱然強勢愴乎殊鄰登庾亮之南樓
坐得折衝之略開平津之東閣行為作輔之謀
泥詔其頌脂車以俟某結髮自立盪中無聞攜
持不肖之資掇拾有司之第頌嗜好酸寒之獨
異惟生活冷淡之是親粵自授文適逢知己誇
黃絹於幼婦初乏好辭賜墨綬於老侯終非善
履幸迓吏讓謾作京遊在長者誠一味其言柰
君門不可徑而入暮鳥已勸自合知還寒蠅甚
癡尚須驅去雖云外司馬也抑有小朝廷烏吏
我修明使條寬大念成名共記之有舊將改容
加飾之又新靡待及瓜遽令受粟武昌號多士
豈資開決之才廣平沈下僚尚假察廉之苑有
勤歸嚮未易數云

通趙總領

連十萬師而給餉遠揚英蕩之光同二千石以
承流近假屏星之芘祇事有日榮遇自天恭惟
某官周麟趾之遺風唐虬鬚之真種所居國重
自與人殊高挹雋科驚學海文河之浩蕩晉儀
要貫睹卽星卿月之輝煌凡所踐揚妙於裁剝
崇牙旣植則藩垣斯固直指所臨而獄岸以清
積三年至九年之儲已著將輸之効由一路總
六路之任更資供億之勞自清海包戈之余而
潢池弄兵者衆瘡痍未復饑饉荐臻四郊之壁
壘固多千里之舳艫弗繼要令民不加賦而用
度足湏知國必有人而根本強卓爾蕭晏之才
出乎間平之冒獨持貨柄盡護戎裝寬宸旒北
顧之憂非公何恃正揆席左虛之位不晚遄歸
某居家自脩游世寡與甫脫選坑於獨冷之地
又償縣債於多艱之時好弦歌而不衰魯孔子
所願學也歸田園而未遂陶元亮真何人哉竭
耒上都阨在逆旅皇天豈無於老眼公台亦有
於知音弗能持矛有以爭名姑且貪釜鍾而遠
仕當行臺之治所趨別駕之戍期備訪問於朝

夕之間賓筵甚設免震凌於風雨之際國諫焉
依喜溢于中言宣罔既

通王運使

同年踈若晨星獨仰階符之峻二天臨乎冀部
預增泥軼之榮屬方問趨成之津知己揆建臺
之日承顏滋通詞候宜先恭惟某官今古曾襟
聖賢步驟縱橫陳禮樂之字施設備文武之方
惟浩氣塞天剛直以自持雖大風動地從容而
不變當邊陲之啓釁倚屏翰以為強守一城戰
百萬之師竟成郤敵升半刺秩二千之石未足

酬勲盖唐平原義士之声名抑魯夾谷真儒之
事業歆作上流之捍蔽弗辭遠嶠之驅馳就錫
褒綸易乘計傳南陽故宅訪孔明得牛馬之遺
赤壁勝遊笑曹公失舳艫之利共推妙畫高掩
前聞矧惟都會之區莫重繼藩之寄虛席已久
疊組為宜姓名久震於穹廬威惠浸浮於荆漢
由大州廉一道我所得兼使上賢為三公孰其
敢侮某名慚共記義感通家既容竊稍食於君
子之鄉又嘗依鄰苑於大夫之邑一遠玉色七
改金行吟鳳鳴鯢化之詩夏難攀附聽龍節虎

符之命深幸趨承且千載之遇是謂知心而三日之別更湏刮目矧垂憐之素厚復受察以采新平分風月之間豈惟不暇亦不敢相忘江湖之上固知有合必有成距躍以還言翰莫既

通趙判院

外建總臺賓儀甚盛內參列院賢望獨高賤者叨半刺之除幸哉託同寅之苑恭惟某官宗室之雋士民所尊才資與世以不常德性自天而有覺一用志耕文之苑兩收功戰藝之場快著先鞭善藏余月佳花樹政疇庸居諸邑之優細

柳餉師列屬等中朝之貴賸持婉々之畫密贊皇々之華見重衣冠增光樽俎宜與玉人序侯國之上即為法從在天子之旁某應舉得名積憂喪志晚脫六階之選冥行百里之涂幸免推擠尚堪趨走謬承二政之乏實惟鄰德之依與英俊之游愧難追與步武受澄清之察願曲借於齒牙悃倒之私言宣罔既

通汪總幹

贊決藩條實近王人之所參司總計幸同君子之寮矢此中懷繫于下執恭惟某官才無半岸

學有本原八座文昌步相先於台斗一門時傑
色交繁於琳琅早從儉幕之游仍得密琴之趣
當萬旅雲屯之地乃四牡日馳之秋客有婉謀
師多宿飽願在外効能之已久使見上陳義而
必高信不負黃華使表薦之言抑可紹法從臣
家傳之業某零丁多難拓落勸游以課第六僅
免於推擠雖技有五奚堪於闕決幸聯官治密
附鄰光緹油屏無德以居預懷惕息黃金臺多
賢所聚尚賴保持

通張總幹

漢使堂：廣延寮案周原膺：盡屬旃幪矧二
政之在旁繫上賓之借重可稽赤劄以寫素心
恭惟某官天下奇才物表高韻服仁食義知所
學之有傳樹業建功要以身而自致風馳四牡
雲集萬師豈惟治甲午之兵固須問庚癸之政
辟書未上曳履居先從容畫諾之間饒衍轉輸
之利倚聞徵召入備論思某貧為斗食之謀猥
竊星屏之駕長江遠戍全空寒號幸近清明之
天稍脫歎危之地佐史號多士奚資闕決之功
皇華記腐儒或藉推揚之力

通趙監庫

外司農之設屬多得名流半刺史之乏才兼收
下乘同寅有契遠戍何辭恭惟某官跨海脩程
摩天喬幹沐詩書之澤期自致於功名依禮樂
之華肯下親於會計顧供億可強於軍旅而選
除實等於京師樽俎春容衣冠健美舉士及筮
庫之衆推以為先從臣在屬車之間用之有漸
某慚居副政樂在依仁矧熊子之故都有鶴僊
之遺迹沈湔塵土頷略江山東閣官梅豈必作
它州之夢南樓夜月不妨陪上客之游

通鄭運管

大使車之有耀允藉賓謀外司馬之非才偶聯
官治行將會弁用是奏緘恭惟某官朱弦清音
白珩至寶服古書而飾吏推家學以庇民絳侯
本兵元勳在于社稷管氏世紀盛德及于子孫
自發輶占雙鵝之祥暨奏刀見全牛之解厥問
既顯所取何廉當直指之建臺乃斜飛而入暮
青天轉粟平地流錢日某掾卿之所為亟言於
上如公才子者復幾宜置于朝某造物見憐居
官免戾甫解縣同之組驟升倅二之輿揣已奚

堪依人則可參佐極一時之選或許並游察廉
有二天之明更持自質

通司馬運幹

籍甚臺賓出元祐名臣之後眇為州佐在武昌
多士之中察案雖同等倫絕異惟不賜於鄙薄
庶可通於殷勤恭惟某官神秀天成才美世濟
中國用司馬相紀茂績於旂常有子繼太史公
細遺編於金匱源流甚遠步武難稽一從免庫
之薦揚兩與漕車之辟召營分細柳綽有余糧
節擁皇華全資婉畫雖有光樽俎之禮曾未究

詩書之功佇命詔徵晉儀扈從某茂聞縣最冒
處州端責之康沂則甚難託於寶鄰而乃幸察
郡國之能與否願自激昂喜賓主之賢而明相
為覆護

通汪帳幹

梁國上賓實贊澄清之略荊州別駕敢專裁決
之能臭味不殊顏色滋邇可無隻字以寓寸悰
恭惟某官霽月曾襟青雲步武學通諸古而有
用才施於今而不窮棲鳳停鸞何嘗擇地吟松
詠竹固自宜人應使者之特招裨公家之大計

想白粲連舳艦而下由玄機運幃幄之中笑譚
之余譽問人顯下字本作章下欲平治有網維州牧者參之
衆所觀瞻其羽儀天朝也必矣某其從遠戍端
為不驅昂未免窘束於折腰今乃得春容而展
足材焉無取仁者是依一座盡傾固難攀於逸
駕六條受察尚曲苑於孤蹤

橘山四六卷第十五

橘山四六卷十六

賀京西柴安撫

出縛疏恩建麾作牧整皇華六轡之馭績用有
成擁元戎十乘之車部封如故鄰光所照邊瑣
不驚恭惟某官特立之儒間生於世斯道拔俗
雖泰山不足以為高以才濟時如大海莫知其
所止涉筆清嚴之署剖符險要之區居邊方何
異於立朝有郡最允宜於刺部公之素蘊帝所
深知總獄訟財賦之司多多益辦任禮樂詩書
之帥綽綽有余華之以延閣之名重之以連城



原件短缺

之寄且召公開國公西陝而有稱使孔子相王
為東周而亦可某阻剖前武喜聽先庚紀登臨
峴首之碑名流相繼詠控帶荆門之句大瓦馬
依其為忻翹罔罄敷叙

賀宋提刑除兵部郎官

祥刑奏最溫詔趣歸海內蒼生方共仰郎官之
宿河東故吏難獨私刺史之天敢誦所聞更持
自賀恭惟某官卓然儒行清矣僊才自先世擅
四蜀之名實生魁彥雖本朝推二宋之懿難儷
慶門未登振鷺之庭孰識冥鴻之志寤以片言

回諸曹官

裁決非長負愧筭篁之駕謀謨有助增光玳瑁
之筵先沐好音曷酬遠意恭惟某官國之儀羽
人所觀瞻抗志轆轤之間未知紀極試才盤錯
之際姑見緒余幕府清尊人流高妙持此贊糞
黃之術歸而謁堯舜之君某謬佐藩宣幸同寮
案共康北海功豈在於王祥高會南樓事可追
於庾亮

回諸知縣

可使佐州誤玷六雄之選未須行縣熟聞三異

之稱得公為寮容我切位伏惟某官文窺大巧
行擷衆芳太學諸生頌何蕃而甚苦禮部四奉
第韓愈以奚遲由勾稽吟我而未居抗字催科
之最時雖多於灾變民不舌於儉荒博採公言
咸曰美朝方朝廷重親人之職宜有裏言俾儒
者展致君之懷必非小用某亦嘗季製徒費薦
書頌骨寒難寘於周行且才劣僅堪於別乘凡
為保鄣相与綱維先荷傾懷枉垂露清風之札
尚須洗耳聽高山流水之音

回盧縣丞

州居上流奚堪閔决縣有良佐亦許寮廉願仰
斗之已深幸披雲之不遠伏惟某官天材特立
世德有承来自千岩万壑之間蔚然秀色游于
四槐二松之下穆若清声勉鼓前脩進儀要貫
某為貧而仕取室於鄰所願同寅俱不負丞哉
之職茲勤先施何足當賢矣之書

回張主簿

邦國不空匪由別駕民社甚重允籍同寮幸覲
面之有期亟齋身而取庇伏惟某官天材雋朗
世闕清高湖陰第一之名流實生驥子江夏無

双之故里暫作鳶棲何処心之適平亦隨事以
為樂少儲望實即輅詔徵某佐政非長依仁甚
迎親聆博約勝讀十年之書雅意勤渠先在五
雲之翰聊占根語莫究感悰

回王縣尉

州稱都會閩决為難縣有同寮警巡居要幸仁
賢之足恃容孤拙以苟安伏惟某官問學源深
功名路坦論自一鄉之秀萃為六館之英以秋
溇瑞錦之文亟收上第豈平陵搖金之地可駐
脩程即輅褒揚寔階華要某結裝在道望履有
期眷義上簿於雲霄音書遠未於江漢龔龔藏
榮矣珍報缺然

回漢陽趙知軍

外建茅土之邦固須有二旁連寶玉之國自以
不孤問五良馬之起居覓双鯉魚之飛舞恭惟
某官賢為舜叙秀出文昭落筆九天亟取名於
譚笑著鞭千里備有志於事功晝夜久耀於閩
山春騎遠臨於漢水念襟帶相聯之地當兵革
甫定之秋民喜來蘇吏愁去嘉願滌蕩振刷使
旧俗皆丕變而勞來安集知今日所宜先啓藩

云初報政甚速歸田之農莫不解刀而買犢犇
幕之虜殆如奉扇以驅蚊坐令百室之豐盈豈
待十年之生聚鎮此邊圉屹如長城自後周合
二縣以為軍獨推善治在大唐用九人而作相
竚繼芳猷某慕元子漫郎之名忝庾公佐史之
列鄰封所接交蔭焉依曾柔削之未修荷好音
之先及寵之以英詞妙墨濡之以厚幣名樽下
拜凌兢中懷闔澤青天在望雖未諧雲霧之披
明月見分豈復嘆江湖之隔欲酬雅意祇託空
言

通周提刑

分乘一傳愧無佐岳之能受察六條竊有戴天
之幸問行臺衣篝之適進小夫竿牘之誠恭惟
某官門閥清高品流勝妙操成風之刃凡所解
數千牛猷明月之珍豈特照十二乘自日边而
發軔至江右以揚鑣卓有最声徹于上聽且長
安為利名之都府孰不爭趨歆荒陬戴恩德於
朝廷獨從遠去稠壘双旌之寄光華六轡之行
剔抉吏奸諮諏民病刑一成不變也久矣尽心
法三尺安出哉斷之在已繡衣當春宵而立密

綱無秋荼之傷一路清夷百城震聳持平反之
丹筆民以不寃司出納之紫機世其有濟某青
燈末學白髮孤官攜持無瓊琰之奇嗜好有鹹
酸之意志其退靜誰言懷祖之癡分絕寵榮自
信安仁之拙謂曾試邑強使監州但將粗白之
心用取察廉之芘甫解裝而服役欣叱馭以按
臨快覩宜先通名敢後雖云治中別駕之可歎
終亦非才勿以柱後惠文而見彈尚堪自効

通江陵制帥李尚書

上卿作牧威震十連下吏承流任叨半刺願陸

陸貧驅而至此有恢恢宏覆以臨之已遂合符
敢忘奏記恭惟某官注驥崑鳳之瑞隋珠和璧
之珍出以其時生之有地光足以連五星而合
日月志在乎馳千里而絕雲霓端卿得之羽儀
朝廷贊皇推此經綸天下蓋三絕之兼有何一
第之足云克對前芳信非凡種在荷橐論思之
已久宜藻旒眷注之采深入則揔喉舌之司出
則壯股肱之郡命令行乎缺鉞之下顏色動於
旗幟之間西清真學士之名上不輕予南平都
制置之号昔所未聞念边圍驛騷之余倚元戎

填拊之重津哀異數式懋遠圖惠愛流浹於江
 湖声名播揚於夷狄凡從容制勝皆詩書禮樂
 之功使端委秉成實社稷宗廟之福某誨規無
 取學製奚堪驅牛上太行愁絕歌危之步騎驢
 到京邑難追英俊之游与其爭名於朝爭利於
 市之多憂孰若遜畔而耕遜路而行之為勝勉
 持弱植未佐雄藩亦欲俾庶民相安田里之間
 豈特與太守平分風月而已所幸託二天之廣
 或容効一日之長以時問太府之起居禮其敢
 廢每歲考諸州之能否恩則有歸

通鞏都大仍謝嬰劄

展士元別駕之足揚若淵深得劉公一紙之書
 恍從天墜頌吏禮尚稽於先贊而使華已貴於
 下寮恩莫報酬義當感奮恭惟某官世有令德
 身荷美名以秋濤瑞錦之文題俊科以冰壺玉
 衡之質儀官署操割共推於善刃飛騰獨着於
 先鞭壁沼繙經士知就正棘林涉筆人賴決平
 蓋將消田里之嘆愁聊復對江山而坐嘯化孚
 兩郡蒼震九閔以半天下之貨權屬大使者之
 節制自錢神隱伏之久在鐘供億之難採銅同

於山化鐵以水縱極其鎔鑄淬磨之利難勝夫
 鉦銷滲泄之多况藏鏹於家者浩浩莫可窺而
 操券於市者俵々无所售弊至極矣策安出哉
 導其生息之源濟以變通之術使天不愛道地
 不愛寶故民有余力君有余才凡七福之可與
 繫一賢之是賴秘旨寓直津褒富國之能英袞
 遄歸式究佐王之業某少焉未第老矣外官弗
 能事衆駿之鞍鞿每自託孤鴻而賦詠念冉求
 可為邑宰試已固功謂李諒合在朝行言何有
 味耻作起起之進甘為夔鑠之行惟瞻仰二天
 之高能照臨九路之廣誓殫綿薄勉副澄清方
 命令之是承豈言辭之敢廢未而後往事上之
 敬已虧貸而且成御下之人斯在悽悽至望晷
 晷難宣

回漢陽趙知監

妙東宗英富矣鑄山之利猥居隣壤缺焉康海
 之功先既有來於五雲相親奚間於一水恭惟
 某官學窮根柢文律波瀾卓卓然穎異之才自
 天而下振振乎信厚之族何城之如僊名早策
 於禁庭儁武高騫於榮路在筦庫之七十士薦

自公車宜執政之二三臣收之翹閣尚煩外補
聊屈遠裔以漢鐵官之重權得周泉府之園法
裕國之課未上班朝之命匪稽某闕決无堪依
憑有所喜佳音之及境之好語之報珍半世之
仰清風即諧覲面隔江而共明月何幸分光

回趙路分

显膺宸綍出總戎弋控制上流有樽俎折衝之
勞低回半刺之詩書經武之謀幸此同寅庶乎
多助恭惟某官有唐帝種為漢宗英大雅不羣
本儒經之素熟至仁有勇宜將略之兼優羽林
夙著於名聲園廡載閱於儀矩尚煩星馭未典
雲屯聽先甲之一新驚竒謀之六出執干戈而
衛上要為強本之裔分寶玉以展親佇有造朝
之命某服膺滋久覲面匪遙厚華翰以先之見
高情之厚甚我方外司曾馬微橫草之功此乃
真將軍安有前茅之慮行將依芘何以報珍

賀徐殿院

龍光狎至豸列峻升逢圣人猶日之中大明公
道見御史從天而降就正雄權望高一臺勢重
九鼎恭惟某官學為世仰道與時偕游辟雍之

池已具舟梁之用題慈恩之塔聿崇冠冕之瞻
所積既深其發必大方一君一相圖回於上莫
急賢才凡六院六察除授之公必先縣最應本
朝之懿典屬當代之偉人隱慝潛奸豈待雷霆
之盡擊危言正色自令山嶽之皆搖已儲望三
槐位之間聊進步五花墀之上俾專議論益廣
察廉昔朝廷得李勉而始尊紀綱素定今殿中
有行成之克正風采采新律疇執法之庸遂究
贊元之業某名慚共記秩忝同班浩渺江湖嘆
冥鴻之偶影清明霄漢羨秋鷄之孤騫直指所
臨懦裏為起居然增善類之光耀足以慰故人
之寂寥借上林一枝之棲信无榮分得大厦万
間之芘切有歡顏頌詠徒勤染濡莫既

賀胡宗丞兼右司

宸庭疏渥宗寺陞華涉筆以列三丞式顯顯
之望峩冠而游二府仍資婉婉之謀疊命有光
合詞致慶恭惟某官一塵不染五彩自成由天
開於加祥故世出於英傑肅肅我祖奮先朝社
稷之忠振振爾孫紹故家文獻之美盖有術有
根抵如參雲喬木垂蔭者遠宜人物皆光明媿

連城竒璞含章在中媚于班聯清哉標峙佐佑
紫極孰窺堂上之竒兵出入黃扉其聞天下之
大計已在觀瞻之表尚何步武之拘要熟踐揚
益深儲蘊盤維之屬倚二政以為重綱轄之司
東長才而得兼茲實階柄用之榮奚止席藁班
之旧某隨牒在遠曳裾莫前方公道賴以扶持
故善類為之抃躍无王祥之功以康海国祇覓
厚顏蒙子公之力而入帝城敢萌狂想齒牙余
論頂踵知歸

謝王運使奉政績

大使薦賢誠不以私恩而累公道小才佐郡愧
无其實効而冒虛名人謂是奉加厚於同年已
獨自知見信於平日今茲在六察之末粗能罄
千慮之愚不忍弃捐遂塵料理方競名之際容
或求之而弗得且沾惠者多安有獎之而不知
高哉古風始于門下非意望之所到遽傳聞而
若驚如某者自蚤充賓及壯試吏唯勉行於清
潔盖備歷於嶽崎柔声婉顏恥作絳枯之鬼避
足延顙適逢起廢之人朝籍既已謬通縣課僅
能自脫巍巍觀闕仰衆駿之爭馳渺渺江湖聽

雙鳧之遠去分武昌樓前之夜月依皇華堂上
之辰星頌念同升之流復有相遭之地雖云通
守何啻如末寮之礼事大官幸遇明公亦不以
崇臺之勢忽下士許參密畫振起宏網然祿於
上者非富貴其身故須引類苟戕其二者不可
否於事何以觀能方自詭効襍線之長乃誤蒙
收履躋之旧亞于三俊送之九霄推相求以氣
相知以心故不叩而響不介而合如斯清奉未
之前聞茲盖伏遇某官宇宙声名聖賢步武中
流峻峙障回既倒之瀾虛室同開鑒徹方表之
境民隱悉歸於諮度吏汙務在於洗除觀醫師
无遺用乃宰相之方宜兼收於藥籠謂君子有
持招亦使者之任遂加敬於題輿賜之有味之
言增其不貲之價所蒙厚甚自視歎然某敢不
祇服教條恪修名檢庇身得所惟賴我冀州之
天報德謂何有如此漢江之水

遠迎王總領

錦帳護師未從蜀道緹車分守適在吳都固知
命令奔走之當先抑喜光華臨照之甚適吉蠲
子墨僭恩主書恭惟某官特立之儒間生于世

褒以文显儲精實自於岷山導惟勲高流慶諒
同於淮水遠騰表薦遄被召歸天上衣冠交映
積星之次閔中饒魏共推大匠之能弗辭九折
阪叱馭之勞就訪五文原留屯之利方增竈以
云備又張旌而啓行苟欲濟時何拘易地自六
龍南渡秋防莫急於長江迨四牡西徠春律已
回於細柳澄清之路寔廣馨香之渥采新本強
於內而外可攘富藏于下而上不致以君子治
財之道為今日經武之方仰惟行臺素有成畫
邊軍置度支之使既克紹於唐規國用秉冢宰
之官宜進持於周柄其學操僅免題坐奚堪始
去京師切有昌黎感時之歎今居湖上豈无子
牟恋闕之心雖不及智者之猷其謀又安敢食
馬而怠其事願殫薄伎受察寬條覆之以獨有
之天暴之以可愛之日如斯榮遇慰我孤懷若
倚辦求銳敏之才固難陪於新進惟勤輸免稽
逋之令尚可備於前驅踊躍自言悃忱莫罄

謝趙總卿奉政績

總饒權於四使獨推卿月之明采治狀於三儒
曲借屏星之重榮哉褒字揚若驚懷既弗緣介

紹之先容又且乏平生之雅故以其奉令承教
於崇臺之下或者察形覘行於稠人之間不待
有郎之自言已識此君之小異且六路八十州
之廣才亦繁多而半刺二千石之良譽何蕭瑟
方以激濁揚清而自任豈容貴遠賤近之或偏
有覲孤生亦汙公選如某者為官栝落與世參
差家惟一畝環堵之宮朝元九品葭莩之一冥
鴻遠去糶寒影於重湖別鶴長鳴搖歸心於故
國低回苟祿閑決罔功但知勤輸以佐大農僅
免乏與而罪下吏然薄俗競進願弗來自與者
曠千載而後逢苟明公見遺雖它有相知者累
萬人而何益果蒙料理得所依歸加盼睽於奧
溲之中送吹噓於青冥之上茲蓋伏遇某官與
造物同其量以古人存諸心大雅不郡漢河間
為近矣中僨復振唐劉彥有勞焉誅鋤吏奸綜
核軍實原清堂上既成富國之規摹翹材館中
爰講相王之事業者在職之能隳否見為謀之
深且長方絲綸焜耀以促行尚斤斧輪困而不
弃僥喻已甚稱塞若何某謹當躬佩清箴力鞭
後乘稱善人不善人遠矣公能体上意之勤遇

國士以國士報之僕敢負終身之願

賀刑部李尚書

子環趣觀出綽疏恩控荆衮之上流久煩節制
踐台斗之故步益茂春知民命所司士論惟允
恭惟某官萃一門之英而居其最揔百氏之學
而无所遺置之屬車望傾鄒枚授以帥鉞勲隆
方召宸庭懷聽履之旧邦人誦歸衮之榮再瞻
清光培增直氣國多暇日謹守明刑之規天匪
先秋深識建官之意熒煌八座咫尺三階推此
丹筆之心轉于洪鈞之手某昔依使部今出師

門冠裾之賀莫前丞牘之敬伊迓款誠所萃膚

略奚云

橘山四六卷第十六

橘山四六卷第十七

賀董正言

古潛李

廷忠居厚

紫渙對敷青蒲伏奏薄外郡戀禁闈初無汲長
孺之利心繇中秘登諫垣自是元微之之故步
俗皆趨競所以獎退靜之士朝方清明而能容
謇諤之臣允合僉謀奚待次奉恭惟某官至寶
不琢大音希声謂千載間生得之為甚難故一
歲屢遷用之如弗及粵從別乘入覲修門籍甚
薦論固宜策要津之足廉於進取獨願分遐嶠

之符帝席遂為之前廷紳無出其右便蕃晉寵
奮迅周行下博士之帷明制禮相因之本直太
史之筆得書法不隱之傳朝游麟臺暮直騎省
蓋上欲神明其耳目惟公能忠忘乎腹心縱壑
遇風既云得路回天轉日何憚極言群儉蓄縮
以避鋒万彙伸舒而吐氣號慶曆之四諫在君
子何黨乎進加祐之五規知中國有相矣某干
名素拙涉數多奇棄閑傳以西游志無所就排
國門而東出氣或未降悞蒙題坐之招姑作代
耕之計逃聞綸綍起振囊衣公道由此開張善
類得其憑籍同年進士堪悲隴右之賤貧厚祿
故人胡忍杜陵之斷絕頌言不敏悅慕唯塵

賀趙提率

護万庾以建臺廟奉先庾之令辱一言而題坐
慚非典午之才方以身受察而受容宜於禮必
誠而必敬恭惟某官作周強屏為漢粲親雄陣
先登壯矣文詞之筆脩程莫禦富哉事業之機
雖半天下皆信厚之賢惟重湖間稱治平之最
千樹之花近聯於棠舍五馬之馳兼駕於星輶
律疇歛散之庸就畀光華之節且武昌據上流

之要而常平乏積歲之儲一遇不登四顧無策
十萬緡見還於糴本實荷聖恩百千艘來自於
稔鄉少蘇民察俾鄰壤通融而相濟在使天廣
大之焉依明指班行驩聲翔舞由一州廉一道
治所不移為三公應三台時焉有待某事賢惟
旧覲德浸賒昔領縣同嘗辱緹屏之臨照今居
州二文勤濡轡之澄清疊此幸榮茂其孤拙魏
侯有故吏未遑修避席之恭荊州遇明公其敢
廢作牋之慶

遠迎宋提刑

暴公子直指之名聳聞已久岑長史緩步之計
取芘何多仰巍巍二天之所臨寔寥寥千載而
後遇恭惟其官韻高物表名滿世間双鳧鳥之
真僊風流是似万鵠袍之魁彥文藝最優信由
東井之輝芒化作南溟之羽翮加孟軻以卿相
之貴藐而視之起伊尹於畎畝之中幡然改矣
雖大才當今而誰舍然古也自古以難行願方
涉太常之筆以贊文容又復懷會稽之章而歸
故里兩川之間覩風已熟重湖之濱易地何辭
當干戈甫定之余在桴鼓稀鳴之際奉行漢詔

之寬大能使周囹之空虛於斯盡君子之心福
僅周於一路若其清天下之志位合正於三階
某退惟孱庸強自修飭笑競趨之末俗其孤寂
於外官左琴右書昔安得一人之最南山北水
今乃容司馬之閑在一介尸素之罔功何二臺
薦墨之有味未司臬事復值仁公傾耳條教之
頌引脰軒輶之至光輝君命豈惟專督捕之權
精白吏心儻可備察廉之數其為舞躍曷究編
摩

賀列給事

對敷昕陛擢正夕闡疇咨已試之能直声素著
塗歸不便之詔忠力采宣天為回聰地亦改觀
恭惟某官有材不世非器可名專儒學以為之
宗一門鼎列登春官而居其甲千里壯行稍厭
承明之廬自詭皇華之節帝惜其去公造以歸
振起朝綱君正而百官正參平國論賢和而萬
物和凡琴治更張之功由橐英獻納之益乃至
執二勅而不下讀三墳而在前昔號兼司今稱
特拜此當宁眷倚之尤重碩若特登庸之可稽
行矣告廷繼茲賀野某久違牆仞遠戍江干頻

記俊游曾共賦御溝之柳
逸聞显渥还再瞻禁
闈之花忝預年盟喜忘宵寐
方將窺勲名於不
朽豈徒竊光耀以自榮
勿於公朝而植私恩故
須駁奏然以大人而勤
小物或在甄收繭素所
陳衷赤未究

謝李制帥奉陞陟

十乘啓行妄作龍門之想
一言題坐榮踰麟筆
之褒謂屬部久託於澄清
而推賢貴及於寒素
既無蚍蜉蟻子之援况在
塵埃泥滓之中得於
心知特以事奉出隻手而
甚易動郡目而驚為
此道蕭瑟者幾年何意
光明於今日第漸濫吹
弗稱革衣如某者羽翰
非強骨体不媚思古人
靜俟之義忘世俗競趨
之心寒女之乏杼機難
施巧妙農夫之勤穰黍
粗免饑饉在天一涯分
地千里豈容江州司馬
獨從容山水之間每冀
皇華使車共驅馳原隰
之上問民疾苦察吏姦
媮軍輸免於稽逋酒榷
為之增羨慮云一得技
有五窮誤兩臺之賞音
汙公朝之薦牘固知依
暢谷之日近地先春豈
如出泰山之雲崇朝遍
兩遂令槁質併有榮光
匪特望寸進而資巨力

之扶柳且得片語以為終身之託亦足以立敢
昧所歸茲蓋伏遇某官清明如神謙尊自牧為
喉舌保天子德既顯於儀朝以鉄鉞鎮河陽礼
尤先於拔士凡一介善之可取雖三吐餐而不
辞蓋將植輔相之基所以廣匠師之蓄方袞繡
歸公之速猶網羅在野之遺致茲孳孳亦蒙甄
異遭逢若此銜戴謂何某敢不刻勵自修糜捐
上報升堂而未入室固弗如二三子之賢軟血
而預捧盤必不在十九人之後過斯以往未識
所裁

賀刘制帥

借重橐英控上流而作屏加崇閫制連兩道以
宣威照臨如在於軼前名字合通於齡下恭惟
某官以六學之粹為四蜀之英雪山嵯峨養成
古栢之操錦江浩渺演作秋濤之文來登僊洲
有開雋路更出迭入中外徧揚特立獨行險夷
一致當其冠豸角立螭頭而奮忠謇之舌至於
批龍鱗蹋虎尾而忘顧忌之懷身危而國步安
論定而公道復繡幢玉節但知東井之天高寶
締鴻名更覓西清之地峻人方歌羊叔子峴山

之惠政帝復思葛武侯荊州之遺黎自堅城破
敵之余久勤經理而長江設險之所尤重藩宣
况新府之肇開奄旧封而兼總兩邦之民奚必
爭公於境上二天之化固知隨處而春同條教
不出乎詩書之間號今自行於鈇鉞之外仍資
尹正尽護戎昭昔周公召公成分陝之功有賢
克繼今遼人夏人謹開邊之戎入相可期某濫
矣第名聞於機事家雖寓都畿之地名不挂通
人之門惟老氣翫辭而未降宜蹇步蹒跚而不
進別乘一傳難追跨黃鵠之游聊伴双旌閑詠
採百嶺之曲豈容無事而食故須少効其愚參
翊網維助培基本兩臺由是刮目公車至於交
章今又得先生長者而依歸真所謂稀世殊常
之會遇願加磨淬仰副鞭驅表率其州為方伯
之尊有華益遠趨走之吏自長史以下取芘何
多其為欣愉莫可云喻

謝趙倉使奉陞陟

辱天子之使親布上恩過海沂之邦猥收下乘
俾有晉陞之序借為賁飾之詞然雖至公寧弗
自愧如某者林邊場翹石上根枯茸為寂寞之

遊恥作趨趨之進雖居官而不治惟奉法以自
脩長沙令妄欲綴鴛鴦之班固知無分香山老
乃得成筭篁之駕誰曰非宜豈徒分嘯詠於南
樓北榭之間抑用助勸課於西陌東阡之上庾
粟以時而歛散泉貨務權其重輕寅奉常平之
規粗殫不肖之力近而兩臺之論薦遠則二天
之照知方紆循行之車亦騰剡上之牘出於特
達識所依歸茲蓋伏遇某官蕃屏王家楷模士
類以神明之胃發神明之政以禮樂之英增禮
樂之華既加惠於遠民乃克勤於小物清濁判
矣應不為爨下之桐左右芼之猶且及水中之
荇昔嘗察之於按縣之日今復信之於佐郡之
時有是僥踰奚其稱塞某敢不力行所學躬服
斯言華衮一褒已切窮途之感洪鈞再轉尚希
翹館之歸過此以还未知所措

賀俞侍郎

即家召拜進位論思小宰次太宰之班冠于紫
橐內史兼外史之職本是青氈寵數疊放輿情
胥穆恭惟某官文博而約氣直以和蚤負褒然
之声名著為富有之事業仰昌黎之北斗學者

所宗起安石於東山蒼生何幸雖孤芳忌於皎
潔而大明難以蔽欺合儀禁庭均福寰海闢公
門桃李之逕悉入品題撫掖垣梧竹之陰重未
潤色游揚共二之命載袞袞六之書直筆固存
清街是稱且獻納何拘於日月蓋依乘已迫於
風雲嗣有褒恩進參坐論某心傾燕厦身墮鸚
洲公造歸袞衣子采增抃躍我方外司馬也正
賴挈提

回梁知縣

群山傑觀嘗參五鳳之游雋水名城忽睹双鳧
之集咸謂同寮之君子孰如二政之故人伏惟
某官繼言語侍從之英擅文採風流之懿凡小
施於方略能自致於勲名克贊泉府之謀遂通
天朝之籍勉存吏格式显民庸利刃一揮知錯
節盤根之立解鳴絃再續想引商流羽之采高
不須躬控惚之勞已見秦熙平之最佇未徵召
入備論思某久闊趨風每塵仰斗頻記坐氈之冷
肯分鄰壁之光僕方冒昧以佐州公尚回翔於
製邑高情特異華翰先臨千里之足是然曷勝
至喜十年之夢恍若尚得細論

回交代趙倅

漢懲秦孤建宗藩之上佐魯班鄭後知賢路之
 久妨驚五彩垂雲之光乘千里好風而至恭惟
 某官學醇乎古行茂于時以天孫之文章題俊
 科以王家之禮樂飾吏政我詩讀書於松竹之
 下厥門既休鳴珂曳履於日月之邊所施乃暢
 胡為小卻未此平分謂郡無正守資通守之良
 故朝以同姓代庶姓之賤芟夷荒蕪蘇折困醒
 俾鵠山鸚洲俱為之增明雖榆塞柳營亦至於
 借重宰相才也渠容留滯於荊州天子異焉即
 見會朝於魏闕某在生長帝王之里懶造請公
 卿之門遠屏重湖奄經再歲無功闕決將投傳
 而去之有懷交承茲聞音而喜矣締結芝蘭之
 好掩遮糠粃之蹤所望高風自振薄俗且吏隱
 少公事碩安用於告新惟家藏有素書尚相期
 於傳遠其諸悃悞未究編摩

賀尤提奉

八俊揚鑣莫重庾臺之選六雄濫吹唯便厦屋
 之依矧是藍田受廛之氓復為皇華巡筦之吏
 疊此榮耀越於輩倫恭惟某官綽綽乎才淵淵

其學自星履步九霄之上積有垂芳其雪袍角
一日之長屢聞得雋然文饒不屑於名弟而玄
成豈負於遺經持此致君足可傳世種桃李分
風月蓋已試又試而績愈彰詠襦袴飫糗糧故
可予即予而惠深廣爰畀常平之節用培益下
之基甫看及境以張旌頓覓如春之應律且阜
通山海管晏可復許乎使訐謔廟堂伊呂亡以
加也某靜言嘆梓遺愛在棠傾耳南墻猶記吟
哦之妙系心東閣自憐蹤蹟之疏孤於外官晚
乃別乘何期兩地之遭際載瞻二天之照臨虽
駭：畢成之期尚粟粟空餐之懼益殫未力或
取殊知欽奉寬條未遑持版以拜刺史幸逃公
憲敢希設酒以飲故人企德惟深臨文罔喻

賀趙大卿兼戶侍

趣覲清光駢膺異渥歸班月寺知久護餉之有
勞進取地官使真持何而無媿姑煩兼組已愜
群紳恭惟某官胃出於大學造乎古勁貞之節
嚴霜不凋忠貞之心皎日可照方荆襄之戍未
解唯庚癸之呼是憂津疇九列之英武遘六路
之寄覈伍伍符虛籍之弊累万万錢朽貫之儲

公能為人所至難人謂召公其已晚夕升金掌
朝引玉珂理財正辭率不外原清之道遭時建
策宜莫先經遠之圖宗祏賴以安強裔夷聞而
畏服由斯柄用孰不具瞻某受清門特達之知
竊大厦高明之庇永懷銜結忽聽褒除拘牘制
之孔嚴控賀裹而弗敏論思多暇東春方隆祈
厚輔於冲襟庸丕昭於偉業

遠迎李運使

易乘漢傳晉直亮章使部重臨猶想故家之遺
愛蕃條兼總自知別駕之無功所幸相遭以廉

得察恭惟某官耀名於世儲祐自天四蜀山川
萃作名門之秀三蘇父子復誰後學之宗凡茲
廣內之所儲尽是平生之已見藜燈甫續菲錦
遽成蓋孤芳忌皎潔之姿乃斜飛取回旋之勢
叱邛邲之馭而乘險阪忠則不渝持崆峒之節
而上青霄光斯有遠靖言漢沔近接岷嶓轉粟
飛芻屬先正規恢之旧持斧授鉞經嗣賢臨照
之余再使兒童爭看於細侯下至走卒皆知於
司馬輿情所嚮臺治弗移連數十城之封疆疊
二千石之印綬厥任為劇其才曷勝登崇邃閣

之班增重上流之鎮茂哉續用久矣簡知皇皇
者華昔已梯升於法從辭辭其鄂今當鼎列於
台司某早竊一官晚纔二郡鳳凰城下排闥闔
而已遙鸚鵡洲前濯滄浪而自潔喜受容之得
地奈畢成之有期尺素謾通寸長莫效公未何
暮尚須先負弩之迎我行及辰奚敢辱佩刀之
贈欣翹至切拙啞非宣

回蔣知縣

曳尚方之鳥小試民庸秉副政之車偶聯王事
欽名旧矣惠字先之伏惟某官文采自將才資
持異榮澤有開於奕世清風是似於前人利刃
一揮知錯節盤根之立解鳴絃再續想引商流
羽之宋高恐不須戴星之勞即已自培風之迅
某佐州無取行縣奚為賴保障之得賢容坐輿而
竊祿忽被五雲之翰莫報珍投尚看千樹之花
有未芳譽情之所嚮言則未敷

回荆門交代王知軍

問二車之前躅取則為多繼五馬之後塵合符
伊迓凡此事契兼於常倫辱慶問以先之佩謙
為之過矣恭惟某官天成文采世有典刑西清

從臣之英篤生異器南渡吳王之業亶屬名門
根種不凡源流斯遠益深培養將大設施松竹
林無剪伐之傷風月堂得嘯吟之樂方卷甲息
民之際念臨軒擇守之難辟書朝馳除目夜下
隱然作屏隄邾石以爭高沛若未蘇託蒙泉而
普潤登上三年之最倚聞一札之褒矧昔賢袞
衣之可傳暨故家荷囊之足貴萃茲盛美歸我
老成某末弟僥踰半生困瘁嗟余髮之種種即
合歸田愧此身之飄飄尚猶逐祿顧無功於閔
決復何意於超陞忽沐誤恩就臨便郡幸紀網
之素振適步武之相聯允藉余輝少安孤蹟一
尊杜酒尚須告為政之方五朶郇雲何以答修
辭之貺永懷刻著罔究占陳

回辛簽判

得州如斗猶虞獨任之難以禮為羅庶獲同寅
之益維時上佐光我初筵恭惟某官自天所鍾
為國之寶在景雲執法之士已擅直声逮阜陵
輔政之臣載垂芳烈必有賢者是以似之世其
祿以何慚官所居而可紀金蕖泛水雅宜入幕
之游玉璞在山增重連城之價好持婉畫入奉

清光其僅免負丞奚堪作牧幸依仁之寢迎辱
惠教之相先固知寮屬皆显人所當加敬毋以
曹事煩老子或可喻安

通交代趙倅

拜恩闕下分任治中繇近州佐遠州疊著筭篁
之耀呂異姓先同姓實慚糠粃之蹤敬緘不腆
之詞庸輅方新之莛恭惟某官自天間出與世
特殊上承赤社之封獨抗青雲之志宗藩之服
儒業惟古其稽王邸之擢俊科於今創見長材
所歷最譽甚休鯨海無波已借別車之重鷓山
有月又分半席之光雖少緩於翱翔蓋深儲於
資望帝豈容盤維之久外人皆後袞繡之邊歸
某少則多艰老而轉拙一官平進輿坐苟安五
技易窮素餐奚補甫畢瓜丘之戍有未棣屏之
賢善者繼之吾其免矣忽左符之就畀勤上旨
以趣行王事載嚴弗克奉交龜之酒契家所重
敢忘修烹鯉之書徒切欣翹罔殫敷叙

回陳教授

剖漢竹以臨邊慚非良牧采魯芹而在泮喜得
明師匪特諸生之榮抑為吾府之重恭惟某官

高韻郎出清才夙成所學伯仲乎軻雄有文奴
 隸於屈宋東州勸駕蚤陪十八士之游南省奏
 科巍占一二人之列固知其功名屬少俊聊復
 以詩書教遠氓好持玉振之音入侍金華之講
 某謬共當理允藉多聞不厭寒氈肯作諸侯之
 客有未妙翰絕勝從事之賢徒切感藏同殫敷
 叙

橘山四六卷第十七

橘山四六卷第十八

古潛李

廷忠居厚

回寄居張節推

猥從半刺叨竊一麾慚無騎竹之童爭迎于道
 喜有泛通之客適總是邦行矣親仁惠然枉教
 恭惟某官陽春和寡月旦評高加之涵養之功
 期以光明之業所居可紀姑且從幕下之羅其
 用善藏曾未見囊中之穎帝方思老成之彥公
 正當晚達之時某自顧無庸奚堪共理过干木
 之廬必式問政宜先得陳遵之牘為榮報言敢

後

到任謝廟堂

康海無功僥踰滿秩隆天有命冒昧分符由廟
 謀款重於外官凡邊守多來於佐史得從意表
 揚若鬼驚伏念某本是凡流絕無它伎平生唯
 知守清吾之節所至未嘗懷苟且之心旌為巖
 邦信非讀書鳴琴之可治鄂亦凋郡豈容吟風
 嘯月以自娛積兩地尺寸之勞辱群公品題之
 重退安愚分絕望榮涂敢謂公朝記孤冷之蹤
 忽蒙誤恩其近便之壘匪因私請實自隆知矧

是荆岑介于襄水當北塞要衝之路作南州捍
 蔽之門天驕所殘民瘠未復必有䟽通強敏之
 術乃成經理撫輯之功自顧歎然曷克任此茲
 盖伏遇某官揆元業茂熙載勛崇大臣慮四方
 知邊方之為急宰相遂万物唯小物之克勤豈
 以無階在朝乃至於遐遺使其有志為民即俾
 之共理信此道如懸於衡石愧不才亦玷於筵
 鎔某敢不刻勵內脩廢捐上報方漢京嚴科瑣
 之令非曰具文若晉陽宣保鄣之勞尚能自力

到任謝刘制帥

積媿坐輿進叨乘障小國事大國共命令以宜
 先一天有二天託照臨而寢邇凌兢拜寵感慨
 陳詞伏念其本是凡流迄無它技同前云云茲蓋伏
 遇其官清班人傑先覲宗儒植操貫乎嚴凝持
 心根於平恕篤禮樂詩書之教加幸群眊專弓
 矢鉄鉞之權用威不軌如聞有味之語頗及無
 能之人昔者佐州厚為之覆蒙今焉護塞復歸
 於節制乃造物之深相有終身之榮逢其敢不
 遵奉使條布宣皇指念其近在宇下少推寬假
 之恩使之謹守邊頭庶護妥寧之効真誠所嚮

至訥奚云

謝王總領

求邊守於佐史之間誤蒙推擇望華使於諸侯
 之上復託照臨凡兩地之所遭非一天之可喻
 視龜得吉貢鯉為恭伏念其同前云云茲蓋伏遇某
 官耿介枝俗清明如神妙矣心籌豈特給閔中
 之餉大其已任又将極天下之飢凡今日握節
 之声名乃它時轉鈞之事業念八十州所部之
 甚廣欲二千石共理之皆良其其邊瑣有警始
 為之科條孰若皇華所臨不逃於鑒裁齒牙余

論羽翼遂成甫當畢戎之期更冒就遷之寵某
敢不昭宣德意祇服教條空海沂之邦旣曲蒙
於掩覆護雲中之塞尚勉効於拊摩銜惠有歸
占詞罔喻

謝諸司

猥從半刺叨竊左符雖云千里提封之殊俱在
二天臨照之下所幸者孤身之有託惟懼夫重
任之莫勝伏念某同前茲蓋伏遇某官耿介拔
俗清明如神察百吏罔差於錙銖人其誠服念
一夫不被於潤澤已所深憂肯專用柱後惠文
冠之威嚴欲大施筆端造化炉之工巧遠而將
指同此推心遂令極陋之資亦忝惟良之寄某
謹當昭宣上意祇服使條空海沂之邦旣曲蒙
於掩覆護雲中之塞尚勉効於拊摩銜惠有歸
占詞匪喻

通鄰郡

居一郡乘一障豈書生之所能結四援守四鄰
有寶國之足恃敢於始事之日修此交聘之儀
恭惟某官器資翹明羊度疑遠由南冥九万程
而上孰能禦之在西京二千石之良無以加此

矧山川險要之地屬宵旰顧憂之時喜得名流
聊固吾圉想惟理民整軍之課最于諸城安有
謀王斷國之才久於邊壘上所願見公其遄歸
某浮游江湖荏苒歲月積叨半刺之祿就分左
合之符雖僅免群鬼之柳榆还自笑是翁之矍
鑠幸接名藩之矚能分旁舍之輝有土有邦莫
非為社稷之衛同心同德庶幾如兄弟之親

回漢陽孫守

屏星俗吏奚堪一障之乘壁水儒官豈是三河
之表方密依於鄰比乃先辱於謙函恭惟某官
學濟其才文貫乎道在商野共推於先竟屬漢
庭專用之老成樂育英才需作及時之雨不畏
強禦挽回既倒之瀾甫再轉以為丞乃一麾而
出守於進退之義不苟則中外之望益高雖國
小地狹不足以回旋而事簡民淳何妨於偃息
佇聞徵召入備論思某卷欲歸田強令護塞幸
輔車之相倚曾竿牘之未修恍然驚黼黻之投
慊甚多瓊琚之報極目漢川之樹徒切吳懷洗
耳荆岑之泉尚希垂教

通襄陽楊安撫

由半刺得專城直為誤渥以小侯依大帥密借
余輝方視印之云初豈奏箴之敢後恭惟某官
才豐而業茂度廣而識高承世閱之清風飛翔
千里負霄躔之俊氣凌跨一時利器所施成規
可睹恩深淮浦有襦均惠於兩邦威震湘川持
斧頓清於群寇屬邊方之謀帥勤當守之思賢
未容还表著之榮又復任藩宣之重祕圖寓直
瑞節增華想胷中皆有用之兵宜塞上無可窺
之隙輕裘緩帶依然峴首之風流曳履鳴珂行
矣井泉之法從某佐藩已繆乘障惟恨昔雖同
君子之鄉未降既見今乃近元戎之府自謂不
孤矧荆襄襟帶之連若虞號輔車之倚有善鄰
之寶也所願相親念敵邑而膏之敢忘厚賜深
悼所嚮短韻奚宣

通京西趙運使

雲壘相依繆分邊瓊星臺在望密藉鄰輝屬龜
篆之初開憑鴈緘之上達恭惟某官卓然才業
少所輩倫妙文武之弛張不顯紙上洞古今之
成敗獨運胷中一枝分月殿之香千里奮雲衢
之步幕中飛翰湖山至於動搖塞上剖符夷虜

為之遁去旒冕注懷久矣搢紳交口稱之以其
抗不可犯之風故能任至難為之事由双旌拜
十行之寵以三組揔一路之權貫索夜虛流泉
春涌凡此績用特其緒余問俗觀風宜有澄清
之略謀王斷國盍歸嚴近之班某學殖扶踈宦
涂歷落縣課僅能自脫州政乃得平分初微天
寸之可書忽駭朱丹之在轂匪由推送曷致叨
逾念慈恩塔之姓名幸嘗尾附而皇華堂之風
采深切心傾豈期護塞之行寢覺望塵之近雖
云未見自以不孤一障是乘在今日非昔時之

全盛二天所覆諒此疆其尔介以均恩

謝諸司列薦

風動列城莫重連臺之鷄薦雲從多士乃收別
乘之駑才外觀咸以為榮內者獨能無愧凡君
子以類而進者諸大夫曰賢而用之公論所同
倖得則否博士共薦王式宜為誦說之師要人
交譽宗元白是詞章之伯蓋寶貨橫道莫不爭
取然斷木在溝誰其見知豈謂世俗競名之余
猶存古者僉謀之峯儻非穎異徒切兢危如某
者所學不根於時何補轉頭已晚未免碌碌隨

衆人之行多背成暄尚有區區獻至尊之意竭
耒湖外冒颶州端頰嘗効寸尺之勞豈但為斗
升之計二千石併歸於華使許贊末謀五石緡
用實於邊倉助成廣惠稍知縣譜郡條之大略
敢云儒藝吏術之兼優有誤司聰過塵褒字雖
左符之命既下而公車之奏已前若青冥現吹
噓之神使白晝散柳榆之鬼頓增光耀豈有寅
緣茲蓋伏遇某官契天地同其心以人物任諸
已謂九重耳目之寄遠屬星軺念一路禍福所
關公持藻鑑凡奉令承教於趨走之域已察言
觀行於臨按之時同氣相求合詞耒上借鼎象
三立足之勢施釣鰲一舉手之功顧惟何人亦
預茲選某謹當自繩以法益樹厥功食武昌之
魚而非其有懷正味濯蒙山之泉以自潔不易
初心用此酬恩斷非虛語

遠迎趙運使

少公

易乘駭傳菽剖菟符險要之地惟荆襄併資控
禦淺陋之邦如曹鄩復託按臨阻其前驅敢忘
先贊恭惟某官群紳之望万乘所知太微星間
蓋儲祥之久已祝融峯下欲養晦以誠難賢者

受任於天蒼生恩被其澤且往者屈也來者伸也道實將行苟剛則吐之柔則茹之政奚以立獨稟清明如神之氣能揚耿介拔俗之風肅然外臺強此中國三組堂居上流之勝久著最聲一覽亭俯衆山之卑采增壯觀襟帶有相聯之勢轉輸皆已試之規仍建崇牙未宣江漢更陞革秩寓直蓬萊在一人之眷甚隆恐四輩之召非遠所言利國宜管仲之不足為以道相君惟孔子則所願學某素無有似疊有際遭龍坂同登嘗忝英游之旧鴈門遠戍載依使節之光德

易地之榮除動屬城之驩舞有若小侯事大府惟謹奉承不以公法廢私恩尚希全護誠悃所萃拙本作雅非宣

賀京西柴運使

奏最雄藩升華邊部馳六轡於秦京之道風采凜然把一麾於楚甸之門波潤多矣賀成宮而未果賢從事之先臨恭惟某官學飽祿渠氣橫穹礪語吾君可隄為善際遇誠難凡它人所不敢言攄陳益壯其立朝何九虎之足畏其去國雖万牛而莫回不鄙薄淮陽之民要增廣如陂

之澤茂庸繁者寵數亟頒因其恢恢之材畀以
皇皇之節声名出叔子之上經理得諸葛之遺
豈惟獄訟財賦之繁率歸兼總乃若訂謨方略
之妙合契前籌某猥自佐州強令守塞懵未知
終焉之計幸甚接鄰哉之封且饋有雙魚之塵
何珍可報念城無十雉之固唯瓦是依

賀史丞相進書加恩

係進吏部條法總類并百司吏取補
授法轉金紫光祿大夫進封魯國公

玉陛奏書金章進秩整齊吏治率循蕭相之規
侈大國封式显魯公之拜告庭異數賀野同詞

恭惟某官學洞全幾道躋民極再世而登輔弼
偉勲閎之相輝百辟之仰宗師正朝綱而不紊
社稷賴以安固乾坤為之清夷方循名責實之
政行宜撮要剪繁之事舉念銓綜權衡之地名
器所闕凡刀筆筐篋之流勞能必叙昔者紛綸
而盈凡今焉纂輯以成編地深嘆加公實典領
疏渥衍戶祖之邑開圻重儒服之邦以荅秉成
之功以昭垂後之憲且畫一法隄天下而共莫
匪至公雖正二品居朝廷之尊未為特美故家
有者不日見之某冒死騎頭阻瞻鷓尾遐衝可

折皆由制勝於廟堂邊最幾聞只合放歸於田
里尚茲冗食悉自隆恩

賀雷知院進書轉官

奏篇中禁造秩迓聯粉澤成一王之典章宜膺
褒顯權衡定百工之法式允賴參持吏品以清
朝僉斯穆恭惟某官奧學上下乎千載懿文佐
佑乎六經式契聖明進都丞弼當洗兵交河之
後道以庇民在執政思巖之中心乎體國更張
善化宗核群才雖云列爵之有差每念繁文之
無統非通儒為之折衷則巧史得以並緣筆削
既公網目自正典選者持此以鏡鑒試補者用
此以甄升成編甫徹於前旒寵數亟加於次輔
房謀杜斷共裁定於信書蕭規曹隨佇增光於
揆席某逖聞命綽喜動心旌在天一方曾莫旅
清朝之賀有地千里其敢孤大造之恩

賀張同知除參政

擢自中樞列于次輔由建隆開東西府實處儒
英逮元豐置左右丞預聞政本成憲具在有德
乃升恭惟某官社稷所依文武之特為明主建
長治之策識妙神著在清時成更化之功音諧

廟瑟根於所學之純正位乎本朝而安強一堂
坐運於甲兵四塞稀鳴於桴鼓凡茲制勝之道
屬我基宥之臣入捧絲綸贊調鼎鼐九夷八蠻
雖已賓服五風十雨雖已順成想坐退思巖之
時猶軫若納溝之念使草木無不遂性則日月
可隳爭先持此茂勛永居端揆某託身造化傾
耳拜除瞻望清明無復到鈞天之所奉行寬大
其敢負玉州之民激此懦衷寫之柔牘

賀鄭大諫

顯膺詔旨擢首言司由御史五月而遷信非常

典凡侍臣三日必諫况是專官聿登正直之賢
具孚中外之望恭惟某官氣凌山岳節貫冰霜
蓋魯君子非器之可名宜漢人主必冠而後見
巍然正色革彼邪心豸角分輝知橫榻步趨之
相繼龍顏開霽喜伏蒲風采之猶存宜進長於
七人用蕭清於百辟隳天子辨是非宰輔爭得
失人所至難使朝廷閱輕重社稷繫安危分其
可舍倚聞刻贊前对枋除某繆綰魯符阻瞻烏
戟諒耳目到重湖之外罔不照知念戶門在一
障之間唯當固守

賀金正言

楓宸渙號蒲省晉班由真御史為真諫官既極
選除之妙欵正君心以正天下益摠獻納之忠
國是有歸朝僉斯穆恭惟某官抱負所學震耀
於時挺孤秀以不移擷衆芳而自飾早登翹閣
結帟平父子之知晚立要津展堯舜君民之術
不易居者風霜之任所難犯者雷霆之威見謂
敢言何妨易命廷議而瑩冰玉將坐寢於邪謀
帝用以補山龍實有開於偉業某高冠莫旅小
續是修文諸在野之言敬致得人之賀想正色
立軒墀之上無遠弗知雖孤身墮障塞之間有
恃何恐

賀石殿院

輟從諫列擢置臺端六豸相輝久著峩峩之望
一鷗初擊載揚肅肅之威國本以強相僉斯穆
恭惟某官耀名於世儲賚自天跨海湄於一息
之間壯圖遠矣貫歲寒於千仞之表正色依然
簡在法宮峻登言路欵近而朝廷遠而諸夏皆
出於至正惟進其君子退其小人所閔為不輕
是宜超錦繡之班又復摠風霜之任將整齊

網之既畢則運轉魁柄以何難群頸胥延上
已定某在公有守進賀莫實雖一障未保於頭
顱尚能自立願千里不逃於目睫或照此心

賀倪察院

簡求惟旧察視方新晨入學以誨諸生曾未容
於涉筆夜加階而召御史即已聽於出綸天憲
所關人望斯稱恭惟某官身該百行名揭兩科
由教育撫字之功多故薦揚拔擢之事異上意
先定謂宜居彘列以糾邪我道未夷碩乃望虎
闕而引去適當日月之清照旣想風霜之嚴凝
詔自侯藩丞于胃監人自畏稜稜之白簡公何
心戀於青氈忽拜真除大孚衆聽凡宰庭之
柄用由言路以梯升宏業有開寵光曷旣某叨
紆郡紱阻綴賓裾昔嘆淒涼在朝微扳聯之勢
今承輝輝居边免驚杙之憂舞手載欣濡毫匪
喻

回陸僉判

天下聞放翁之賢宜其有後湖外稱道院之勝
偶此同寅未賓初筵容我坐躡恭惟某官華歆
世濟逸韻天成在茂林脩竹之鄉衣冠註

緣水紅蓮之客罇俎有光屬當蹂躪之余
羽翼之助公肯入諸侯之幕深識雅懷上方錄
從臣之家難留雋武其一麾護塞千里遡風檻
訊櫝之粲然聆足音而喜甚李將軍文書極簡
其共事以何嫌陸先生論撰為多尚異聞之可
扣

賀應正言

賜札中宸伏蒲右省保氏諫諍兼師氏之講說
天日為開正人信任去邪人之蔽欺朝家增重
上所特拜誰不權顏恭惟某官晉大夫之奇才
魯諸儒之奧學雲路四達千里可以追風朝陽
一鳴萬物為之吐氣擢月馨香之署聯于錦繡
之班且士而當得言之秋故君者立無過之地
譬猶木從繩而則正抑使雪見晁而月消所係
不輕是除何歎進陽城於延英閣上疏極慷慨
之懷訪處厚於太液亭演經廣規諷之道命焉
疊組義則同符幸際會於斯辰計登庸之不暮
某边麾有守前祀莫賓作耳目於虞庭信能燭
遠當戶門於楚塞尚賴包荒景嚮惟塵名言曷
既

橘山四六卷十八

道光三年六月重訂



Faint vertical text columns on the right page, likely bleed-through from the reverse side.



